

Nilai Kebenaran

Zainab Nawabi

Tenggelamnya Kapal V. Der Wijck' tajuk novel dalam genggamannya. Dani meneliti kulit novel karya Dr. Hamka yang baru selesai dibacanya. Dani kagum. Nada protes yang ditonjolkan melalui kisah cinta amat menyerlah. Isu pergelutan antara adat dengan hak individu sehingga tenggelamnya kemanusiaan.

Bibit-bibit romantis yang dijangkanya memenuhi cerita hanya tinggal jangkaan. Kisah cinta dalam novel ini terhalang disebabkan oleh sifat dengki. Sifat iri orang ketiga dan orang keempat sehingga merebak kepada pihak-pihak yang sanggup menenggelamkan hak peribadi orang lain demi kepentingan sendiri. Hati Dani terdetik sejenak. Kisah ini mengingatkan Dani akan seseorang yang telah sekian lama berjauhan daripada Dani. Ayah yang dirindunya. Dani dengan segera mengemas barang-barangnya.

Dani melambatkan tangannya kepada pegawai keselamatan perpustakaan universitinya. Pegawai tersebut hanya tersenyum lebar. Seperti biasa, malam itu Dani meninggalkan kawasan kampus seorang diri. Bas akan membawa Dani keluar dari kawasan kampus terus ke terminal bas.

Angka 9.15 tertera pada peranti Surface Pro 4 Dani. Dani mendengus kecil meneliti sejenak jadual mingguannya di aplikasi kalendarnya. Begitu pantas titian hari diraut waktu. Jika diikuti jadualnya, Dani sudah pun selesai membaca satu hingga dua muka surat al-Quran. Dani mendengus lagi.

Dani masih merenung jaluran jadualnya. Dani teringatkan acara seminar yang akan dihidirinya pada hari Isnin hadapan. Tiga hari lagi. Mujurlah segala kertas kerja dan bahan pembentangan sudah disiapkan. Kali ini, seminar itu akan diadakan di Brunei Darussalam buat julung-julung kalinya yang dianjurkan oleh Persatuan Revival Asia.

Dani akan berkongsi pelbagai perspektif menerusi pendapatnya dan pengamatan-pengamatan terhadap isu-isu berkaitan jati diri, kemaslahatan bahasa dan budaya, nasionalisme moden dan pelestarian khazanah bangsa.

Segala bahan perkongsian cuba diingat dan dimainkan berulang kali dalam fikirannya.

“Hidup itu suatu perjuangan. Lakukan sesuatu yang akan membawa diri kau ke medan pertempuran, Dani!” Terngiang-ngiang kata-kata keramat ini di benak Dani.

Ketika bas membelok tajam ke kanan, memasuki terminal bas, Dani menarik nafas panjang. Kata-kata ayahnya tadi sentiasa dilaungkan ke dewan hatinya ke mana sahaja dia berada. Dibawanya sehingga Dani menaiki pesawat Royal Brunei yang cukup selesa. Dia dapat menyemak dan mengemas kini kertas kerjanya dengan cermat dan teratur. Dokumen-dokumen tersebut dimuat rapi ke dalam pemacu dan dikunci dengan kod laluan.

Pada Rabu lalu, Dani telah dipanggil oleh Profesor Rohing, ketua jabatan dan fakultinya. Ketuanya itu meminta segala bahan pembentangan agar diserahkan kepadanya untuk disemak. Dani Hairan. Tidak pernah terjadi hal seperti itu sebelumnya. Doktor Fatimah, Ketua Jabatan Dani, menasihatinya agar akur dengan permintaan Profesor Rohing setelah mengatakan bahawa ia melibatkan kepentingan keselamatan Dani. Dani dapat mengagak ini ada kaitannya dengan ceramahnyanya yang telah disampaikannya dua bulan lalu di Pertemuan Pengkaji Politik Serantau. Dani telah membentangkan tajuk *‘Perancangan Negara-negara di Asia Tenggara’* sehingga mendapat perhatian beberapa orang pemimpin di negara. Ada beberapa pendedahan dan analisis Dani yang dilakukannya sehingga ia tersebar luas di media sosial. Para siswazah dan ahli politik di kampus tidak kurang membincangkannya. Doktor. Fatimah yang prihatin perkembangan terbaharu Dani ini telah menyatakan yang kelantangan Dani tidak dapat diterima oleh sebilangan orang berkepentingan.

“Hati-hati. Jangan bermain dengan api, Dani,” tegas Doktor Fatimah meruncingkan suasana genting bilik pejabatnya. Dani hanya menarik nafas dan mengaup rambut ikalnya ke belakang sambil menyandar pada tembok. Dia memilih untuk berdiam diri.

“Jangan fikir awak tidak dipantau Encik Dani. Saya boleh mengambil tindakan disiplin kerana pelanggaran etos universiti ini. Kuliah-kuliah semua dipantau!” amaran yang tegas dan lantang daripada ketuanya.

“Doktor, saya tidak mempunyai apa-apa maksud yang tidak baik. Segala yang saya sampaikan ialah pendapat dan pengamatan serta kajian saya. Semua yang kita lihat sekarang sedang dalam arus perubahan. Perubahannya sangat drastik dan radikal. Kita harus mengubah arus pendidikan kita juga. Pendidikan yang menyuarakan hak dan maruah kita!”

“Dengan menggugat kemakmuran dan kemajuan yang kita nikmati sekarang?” Soalan itu dirasakan Dani tidak dijangkanya lahir daripada seorang ketua jabatan yang menyokongnya selama ini.

“Apa yang saya perjuangkan ialah kesedaran. Kesedaran agar anak watan kita mampu memilih. Kesedaran untuk mampu mengubah nasib mereka sendiri. Itu sahaja.”

Peristiwa perdebatan singkat yang berlaku dua bulan lalu itu terhenti bermain di minda Dani. Pengumuman pendaratan sedang dijalankan melalui alat pembesar suara. Seorang pramugari berpesan dengan sopan agar Dani mengenakan tali pinggang keselamatan. Pesawat akan melakukan pendaratan sebentar lagi.

Dani disambut mesra oleh setiausaha Persatuan Revival Asia, Perwakilan Brunei; Dayang Amirah yang ditemani oleh datuknya, Awang Haji Soleh yang merupakan seorang penulis novel. Awang Haji Soleh sering menulis kisah-kisah bersifat membela anak watan. Dani cukup kagum dengan penulis prolific ini. Beliau kaya dengan pengalaman dan tidak segan untuk merakamkan pengalaman dan pandangannya menerusi watak-watak yang diwujudkan dalam penulisannya. Rasa kagum itulah yang memacu semangat Dani sejak lima tahun dahulu untuk menghubungi dan mengenali penulis tersebut. Mereka saling bertukar-tukar pendapat dan ulasan menerusi e-mel dan juga sering ziarah kediaman masing-masing. Pertemuan ini langsung menghilangkan rindu mereka.

Para wakil dari seluruh Asia sedang bersiap sedia mengambil tempat masing-masing. Dani mengenakan mikrofon kecil pada kolar bajunya. Begitu juga perwakilan yang lain. Pada pagi itu, Dani mengenakan kemeja batik yang baru sahaja dihadiahkan oleh Dayang Amirah khas untuk acara tersebut. Setiap anggota panel termasuk juruacara diberi taklimat ringkas oleh pengurus pentas tentang isyarat dan arahan-arahan tertentu oleh pengarah acara dan jurukamera yang bertugas. Semuanya dipastikan

berjalan lancar agar siaran langsung dari dewan auditorium yang disiarkan oleh RTB kelihatan kemas dan tersusun. Suasana yang terang-benderang dan tempat duduk yang semakin dipenuhi para siswazah dan kumpulan-kumpulan pelajar daripada beberapa buah sekolah menengah. Kehadiran para pensyarah menghidupkan lagi majlis ilmu pada pagi itu dengan pancaran mauduk: *"Ketamadunan Rumpun Melayu: Dinamik dan Prospek"*. Dayang Amirah ada memberitahu Dani bahawa sekumpulan pelajarinya dari Sekolah Menengah Sri Lambak akan hadir ke acara seminar tersebut sebagai salah satu usaha mengumpul bahan-bahan relevan bagi pertandingan bahas antara negara-negara ASEAN bulan hadapan. Dani tersenyum girang apabila diberitahu tentang perkara tersebut.

Dani membuat persiapan terakhir dengan membetulkan postur duduknya. Dani meneliti wajah para hadirin yang berada di bahagian hadapan. Kemudian, Dani mengimbas pula mereka yang mengambil tempat duduk di bahagian belakang. Imbasan tersebut agak perlahan kerana cahaya lampu di bahagian belakang menyilaukan matanya. Tiba-tiba, imbasan Dani terhenti. Dia cuba memberikan fokus kepada dua wajah di bahagian tengah auditorium. Wajah-wajah yang mengimbau ingatannya terhadap ayahnya. Wajah-wajah itu juga turut merenung Dani. Renungan tajam yang sekali-sekala dilihatnya berpaling ke kiri dan ke kanan. Denyutan nadi Dani semakin kuat. Genggaman pena di tangannya semakin kuat sehingga patah pena itu tanpa disedari.

Dani nekad. Dani bangkit dan bergerak ke arah podium yang diletak di bahagian depan pentas. Dani berbisik kepada juruacara yang sejak tadi sibuk membetulkan duduk letak mikrofon. Dani meminta untuk menyampaikan ceramahnya dahulu. Alasannya, ada urusan keluarga yang tidak dapat dielakkan. Dia harus berangkat pulang secepat mungkin. Mujurlah semua anggota panel dan pihak penganjur bersetuju.

"Baiklah, tanpa berlengah, saya ingin menjemput panelis kita yang pertama, Encik Dani Sameon untuk memulakan pembentangan. Silakan, Encik Dani."

Dani bangkit, dan bergerak ke arah podium. Sambil membuka ucapan, Dani memandang ke arah wajah-wajah tadi. Salah seorang daripada mereka meletakkan jari telunjuknya di bibirnya sebagai isyarat agar Dani berhenti daripada meneruskan niatnya untuk berucap. Niat dan hasrat yang

merupakan hak dan tanggungjawabnya sebagai seorang yang menyampaikan kebenaran. Dani tunduk sebentar menyembunyikan kegusarannya dan mendongak semula lalu memandang wajah Dayang Amirah yang duduk di barisan hadapan auditorium. Dani tersenyum kembali dan memulakan perkongsiannya.

“Kemajuan ekonomi merupakan salah satu punca yang memacu perkembangan sesebuah negara. Ia meletakkan rakyatnya di pentas global untuk bersaing. Sejak beribu-ribu tahun dahulu lagi setiap negara di timur ini, terus-menerus mencipta pelbagai bentuk perniagaan. Termasuklah perdagangan yang inovatif yang menjadi begitu luas dan mencabar kekangan-kekangan yang memantau perdagangan orang-orang timur.”

Dani berdehem sebentar, mencapai segelas air yang telah disediakan di sisi podium. Diteguknya sedikit dan meneruskan ucapannya. Para hadirin tekun mendengar. Ada yang berkerut dahi mereka. Dalam hati tertanya-tanya tentang inti pati sebenar ucapan Encik Dani Sameon itu. Setiap seorang semakin tenggelam dalam pembukaan yang baru sahaja diberikan.

Pada skrin, mula terpancar slaid pembentangan Dani. Sebaik sahaja melihat visual yang dipancarkan itu, lelaki-lelaki tadi mula berbisik sesama sendiri. Tidak seperti apa yang mereka jangkakan. Salah seorang daripadanya mengeluarkan telefon bimbit dan menghantar pesanan ringkas kepada seseorang.

“John Bastin, di dalam sebuah buku yang disusunnya, ada memuatkan statistik bahawa sekitar 5000 hingga 8000 pendatang dari negara luar telah berhijrah ke tanah jajahan orang-orang barat untuk menjalankan aktiviti perniagaan dan perdagangan. Pendatang ini termasuk juga dari timur tengah, India dan para imperialis barat, khususnya Inggeris. Senario ini, mewarnai dunia komersial di negara-negara Nusantara. Namun, ketahanan sesebuah negara menerima pencerobohan ekonomi baharu ini bergantung kepada ketuanan serta jati diri rakyat. Ditambah dengan sikap nasionalis yang ingin mempertahankan negara masing-masing yang membezakan penakatan tamadun anak watan di tanah mereka sendiri.”

Dani berhenti sebentar dan menekan butang tetikus dan memaparkan gambar; rumah-rumah mewah yang dikelilingi air dan terlihat kapsyennya *Damai Cove – dahulunya didiami komuniti masyarakat orang laut.* Slaid

Dani juga memaparkan perkara-perkara lain seperti 'Pusat-pusat hiburan yang pelbagai ragam dengan anak-anak muda watan kelihatan bersukaria,' 'Infograf statistik Kemerosotan Kompetensi Penggunaan Bahasa Ibunda' Dalam Kalangan Anak Watan.' Satu lagi yang menjadi keperihatinan Doktor Fatimah tempoh hari ialah 'Tanah Watan dibangun bagi tujuan rebutan korporat.' Dani sedar mata yang memerhatikannya berkilau-kilau merenungnya tajam. Di dalam hatinya inilah peluang dia menyampaikan apa yang diperjuangkan selama ini.

"Hari ini, pertalian diplomasi yang sangat-sangat rapat antara negara-negara ekonomi raksasa dan sebahagian negara di Asia Tenggara ini begitu membimbangkan sehingga bukan sahaja nasib masyarakat pribumi dipersoalkan malah hak anak watan itu sendiri tidak dipertahankan. Kita sama-sama telah menyaksikan bagaimana lanskap sosial negara kanggaru yang mana masyarakat pribuminya langsung digerhanakan pendatang sehingga kini telah secara total memerintah benua tersebut. Malah, meletakkan bendera negara pendatang sekarang menjadi lambang ketuanan negara tersebut."

Kali ini, terdapat kegusaran pada wajah-wajah para hadirin. Faktafakta dan pandangan yang diberikan agak mengusik pemikiran hadirin. Masing-masing cuba merungkai makna-makna pendedahan Dani yang baru disampaikan. Para pelajar Sekolah Menengah Sri Lambak sibuk mencatat nota selagi Dani terus berucap. Dani cuba mencetuskan pemikiran-pemikiran di dalam benak minda para hadirin.

Siaran langsung di televisyen memberi kelebihan kepada matlamat Dani. Mesejnya langsung dapat ditebarkan ke merata nusantara. Mesej Dani boleh dianggap sebagai satu peringatan dan sebagai satu amaran. Mesej inilah yang membuat beberapa orang tokoh yang berkepentingan berasa gusar.

Dani mendedahkan dalam hujahnya bahawa ada beberapa buah syarikat pemaju yang besar telah membangunkan kawasan perumahan mewah di serata Asia khas untuk golongan mewah yang menguasai ekonomi sejagat. Baru-baru ini sebuah projek besar-besaran untuk membina sebuah kawasan perumahan mewah di kawasan yang dahulunya dipenuhi ladang kelapa sawit dan hutan belantara. Secara mendadak, harga hartanah melonjak tinggi disebabkan prospek kemajuan yang bakal berkembang berikutan

projek tersebut. Akibatnya, penduduk asal kawasan tersebut terpaksa berpindah. Syarikat-syarikat ini sekarang sedang mengintai sebuah kawasan di negara Asia Tenggara yang kaya dengan minyak pula. Mereka bercadang untuk mengubah Kampong Ayer untuk menjadi sebuah kawasan bertema air yang moden dan mempunyai daya penarik bertaraf antarabangsa. Inilah yang dimaksudkan Dani sebuah sistem halus yang akan mengubah lanskap sosial kawasan-kawasan peribumi yang akan dimusnahkan. Para pelabur pula terdiri daripada orang asing yang akan membawa nilai-nilai sosial mereka, lantas mempengaruhi corak pemikiran anak watan. Para pemimpin negara turut dicandu dengan pencapaian visi kemajuan menerusi usulan serta janji-janji manis syarikat-syarikat pemaju tersebut. Mereka berusaha mengaburkan nilai-nilai jati diri, hak rakyat dan perjuangan nasional yang pernah dilaungkan dahulu kala ketika negara ingin meniti kemerdekaan.

Pada slaid yang terakhir, Dani telah mendedahkan nama-nama syarikat pemaju yang bertanggungjawab menjalankan projek-projek pembangunan mewah di sekitar bumi nusantara. Disentuh juga isu kesan-kesan pencemaran dan kerosakan kepada alam semula jadi akibat pembangunan yang pesat dijalankan.

“Tiada jalan pintas ke arah kemajuan. Kepekaan harus menjadi tanggungjawab setiap individu. Merekalah yang bertanggungjawab memajukan ekonomi mereka sendiri. Mereka harus menepis pujukan syarikat-syarikat yang beroperasi bagai serigala lapar. Dani menyarankan setiap individu menepis korupsi di peringkat tertinggi yang melibatkan pegawai kerajaan atau pemerintah untuk mempertahankan kepentingan anak watan daripada tergadai dan dianaktirikan.

“Gunakanlah kuasa dalam sistem demokrasi ini sebaik-baik mungkin. Terima kasih.” Dani menarik nafas lega selepas memberikan ayat terakhir itu. Mencabut pemacu padatnya. Bersalaman dengan ahli panelis yang lain lalu bergegas meninggalkan pentas dalam suasana dewan yang ditenggelami gemuruh tepukan. Dani melewati barisan paling hadapan dan bersalaman juga dengan Awang Haji Soleh yang turut menyatakan sesuatu kepadanya dan juga kepada Dayang Amirah. Dia harus segera pergi. Dani mendongak dan melihat ke arah tempat duduk dua orang lelaki tadi. Mereka telah tiada.

Ketika dia melangkah keluar dari dewan auditorium, telefon bijknya bergegar. Sebuah pesanan ringkas diterima dan mengarahkan Dani menaiki

kereta hitam BMW yang sedang menanti di luar auditorium itu. Arahan tersebut diikuti oleh satu ugutan terhadap ayahnya.

“Kami telah beri amaran jangan bercakap. Awak ada tiga minit.” Dani menutup telefonnya. Dia tiada pilihan. Dia akur.

Sepanjang perjalanan di dalam kereta hitam itu, Dani disuruh diam dan bekerjasama. Di sisi kiri dan kanannya, merupakan dua orang lelaki tadi. Lima belas tahun dahulu, dua orang lelaki inilah yang telah menangkap ayahnya, merampas semua dokumen dan geran tanah beberapa buah pulau selatan dan memaksa ayah Dani menandatangani persetujuan menyerahkan pulau-pulau tersebut kepada sebuah syarikat minyak antarabangsa. Puas Ayah merayu kepada pihak yang bertanggungjawab dan beberapa orang wakil rakyat tetapi tidak dipandang serius. Disebabkan terlalu terdesak, ayah telah bertindak agresif menyerang salah seorang wakil rakyat lalu ditangkap. Semasa dalam tahanan ayah Dani didiagnosis oleh doktor sebagai seorang pesakit jiwa. Segala rayuan yang dilakukan sebelum ini dikira tidak wajar diberi perhatian dan dilabel sebagai kata-kata orang gila. Ayah dimasukkan ke dalam hospital sakit jiwa tempatan. Tiada sesiapa lagi yang berani bersuara. Semenjak Dani menjadi seorang guru sehinggalah sebagai seorang pensyarah, pelbagai kaji selidik telah dilakukannya. Dikenal pasti siapa antara wakil rakyat dan orang penting syarikat-syarikat pemaaju yang menjadi dalang. Disampaikan juga ceramah-ceramah kesedaran bagi generasi-generasi yang sebaya dengan dirinya. Kesempatan dalam persidangan ini merupakan ikhtiaranya yang terakhir untuk mendedahkan segala-segalanya.

Kereta yang dipandu berhenti di sebuah tempat yang sememangnya begitu asing. Dani melihat-lihat ke luar kereta dan dapati dia dibawa ke sebuah kawasan hutan. Dia diheret keluar dan disuruh melutut. Lelaki tadi meminta pamacu padat yang digunakan Dani semasa acara seminar tadi.

“Tidak ada pada aku, pembelot!” tegas Dani ringkas.

“Jangan hendak tipu kami! Nasib kau lebih parah daripada ayah kau, tahu tidak?! Bapa dengan anak sama saja!” satu tendangan hinggap pada perut Dani. Lelaki itu kemudiannya mengeluarkan senjata api dari dalam kereta.

“Masa sudah berubah Dani. Dulu, bapa kau tidak dapat kami bunuh sebab orang kampung ramai yang menyokong dia. Sekarang, engkau seorang

sahaja. Jangan ingat kami akan melepaskan kau. Diberi duit kau tidak mahu. Disuruh tutup mulut celupar engkau itu, kau tetap dengan pembongkaran demi pembongkaran. Jalan ini juga yang kau pilih,” sambung seorang lagi.

Dani berserah kepada Tuhan. Dia hanya membayangkan wajah Dayang Amirah lalu teringat pula persoalan yang timbul setelah membaca novel Doktor Hamka tiga hari lalu, “Tiada jaminan pada cinta dan tanggungjawab dalam pengorbanan itulah jawabannya.”

Dani benar-benar mengharap agar Dayang Amirah memeriksa pemacu padat yang diberikannya melalui Awang Haji Soleh awal tadi. Terdapat banyak lagi maklumat dan rahsia yang boleh didedahkan. Terdengar kini bisikan suara ayahnya di dalam hati, “Dani, biar mati berdiri daripada hidup melutut! Nilai sesebuah pertempuran itu ialah nyawa, Dani, nyawa!”

Dani dapat merasakan muncung pistol yang ditujah ke kepalanya. Dia memejam mata. Kedua-dua tangannya digenggam erat dan otot-otot paha dan kaki dikeraskan. Dalam keadaan sebegini Dani tetap bersedia membuat gerakan pertahanan diri. Degupan jantungnya bertambah kuat. Dani tahu, untuk menegaskan kebenaran, nyawa bukan nilai yang boleh ditukar ganti.

Dalam sedetik, kesunyian hutan simpanan Berakas dinodai dengan bunyi tiga das tembakan yang bergema. Burung-burung berterbangan menambahkan keriuhan saat bunyi tembakan itu. Sepi mengikuti.

Kedengaran langkah kaki meninggalkan kesunyian hutan.

Perbendaharaan Kata

- | | |
|----------------|---|
| • benak | - otak |
| • dicandu | - ketagih (suka, gemar) akan sesuatu |
| • geran | - surat hak milik tanah |
| • imperialis | - pihak (orang, negara dan sebagainya) yang mengamalkan faham imperialisme |
| • kemaslahatan | - kegunaan, faedah |
| • kolonialis | - pihak (orang atau negara) yang mengamalkan fahaman kolonialisme, penjajah |
| • pelestarian | - perlindungan daripada kemusnahan |

- pemacu - peranti perisian ingatan komputer yang digunakan untuk menyimpan dan mendapatkan kembali data pada cakera
- pembentangan - pemaparan, penghuraian, penerangan
- tujuh - menusuk dgn benda tajam

